

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Zašto je nama bitna ljubav prema Muhammedu, s.a.v.s.? Zato što je ta ljubav glavni uvjet za stjecanje Allahove, dž.š., ljubavi. Uzvišeni Allah to potvrđuje i kaže: **“Reci: 'Ako (tvrdite da) Allaha volite, onda mene slijedite i vas će Allah voljeti i grijehе vam oprostiti!' – a Allah prašta i samilostan je.”** (Ali Imran, 31)

To znači da, ako čovjek želi Allahovu, dž.š., ljubav i Džennet, onda treba da voli Poslanika, s.a.v.s.. A da bi dokazao svoju ljubav prema Poslaniku, s.a.v.s., onda treba da slijedi njegov Sunnet. O tome je Muhammed, s.a.v.s., rekao: **„Svi će moji sljedbenici ući u Džennet, osim onih koji odbiju.”** Ashabi upitaše: *„Allahov Poslaniče, zar ima neko da odbija da uđe u Džennet?”* A on reče: **„Onaj tko me slijedi, ući će u Džennet. A onaj koji me ne slijedi, taj odbija da uđe u Džennet.”**

Braćo i sestre! Ima li među nama onih koji ne žele da uđu u Džennet?

A koliko je važno slijediti Poslanika, s.a.v.s., i voljeti ga, dovoljno govori činjenica da je Uzvišeni

Allah na više mjesta u Kur'anu naredio ljudima da slijede Poslanika, s.a.v.s., i da je to slijeđenje učinio uvjetom ispravnog vjerovanja - Pravog puta.

Tako Uzvišeni Allah poručuje: **„Reci: 'Pokoravajte se Allahu i pokoravajte se Poslaniku! A ako glave okrenete, pa (znajte da) on je dužan da radi ono što mu je naređeno, a vi ste dužni da radite ono što je vama naređeno. Ako ga budete slijedili, bit ćete na pravom putu. A Poslanik je dužan samo da jasno obznani.”** (En-Nur, 54) Na drugom mjestu kaže: **“Tko je pokoran Poslaniku, taj je pokoran i Allahu. A ako glavu okrene, pa (znaj da) nismo te poslali da im čuvar budeš.”** (En-Nisa, 80) Zašto nam Uzvišeni Allah naređuje da slijedimo Poslanika, s.a.v.s.? Zato što Muhammed, s.a.v.s., predstavlja najbolji primjer kako treba da se ponaša onaj koji se nada Allahovoj, dž.š., ljubavi i Džennetu. Jer to je čovjek, čijim ponašanjem je Allah, dž.š. bio zadovoljan, čovjek koji je bio na najvišem stupnju morala, čovjek čije je ponašanje bilo u potpunosti u skladu sa Kur'anom, čovjek za čiji se odgoj pobrinuo Gospodar Svjetova, Allah, dž.š..

Na koji način ćemo slijediti našeg Poslanika, s.a.v.s.? Vrlo jednostavno. Poslušajmo što nam savjetuje naš Milostivi Gospodar: **„Ono što vam Poslanik da, to uzmite, a ono što vam zabrani**

ostavite! I bojte se Allaha, jer Allah zaista strahovito kažnjava!” (El-Hašr, 7.)

A kako ćemo znati što nam je Poslanik, s.a.v.s., naredio, a što zabranio? Vrlo lahko. Moramo pronaći vremena za slušanje predavanja o Poslaniku, s.a.v.s., i za čitanje njegovih hadisa i Sire (biografije).

Šta ćemo dobiti ako budemo slijedili Poslanika, s.a.v.s.? Dobit ćemo njegovu ljubav i pažnju na Sudnjem danu. Dobit ćemo pravo da se napijemo sa njegovog izvora Havda. Dobit ćemo pravo na njegovo zagovaranje (šefa'at). Dobit ćemo pravo na druženje sa njim u Džennetu Firdevs. I, naravno, dobit ćemo Allahovu ljubav i pažnju, jer Uzvišeni Allah voli Muhammeda, s.a.v.s., i voli svakog onog tko se ponaša kao Muhammed, s.a.v.s..

Braćo i sestre! Nalazimo se u mjesecu rebi'ul-evvelu, mjesecu Mevluda, kada se sjećamo najvažnijeg događaja u povijesti čovječanstva, a to je rođenje Muhammeda, s.a.v.s. Pred nama se otvara prilika da probudimo ili pojačamo svoju ljubav prema Poslaniku, s.a.v.s., i da probudimo želju da kroz slijeđenje Muhammeda, s.a.v.s., postanemo bolji ljudi i bolji vjernici.

U tom smislu, želim da vas obavijestim da naš džemat sutra (02.12.2017.), ako Bog da, poslije

jacije-namaza, organizira mevludski program u našem mesdžidu i koristim priliku da vas pozovem da budete vi i vaše obitelji podijelite sa nama radost povodom sjećanja na rođenje najboljeg Allahovog roba - Muhammeda, s.a.v.s..

Njegov rođendan, pada danas, 12. rebi'ul-evvela, ali smo iz praktičnih razloga, kako bi što više naših najmlađih moglo prisustvovati, pomjerali program za subotu.

I jedna zanimljivost na kraju hutbe svima nama za pouku i ibret. Različiti mediji prenijeli su svijest da je ime Muhamed je najčešće ime za dječake za čitavu Englesku i Wales kad se tu pribroje ostale varijacije istog imena.

Iako službene statistike pokazuju da su najpopularnija imena za dječake i djevojčice Oliver i Olivia, odluka statističkog ureda da različito napisane varijacije imena Muhamed vodi kao različita imena, prikrla je činjenicu da je Muhamed najčešće ime, a ne na osmom mjestu kako statistika navodi.

Naime, Muhammad, Mohammed, i Mohammad su različita pisanja istog imena i posljedica nepreciznog i slobodnog prijevoda tih imena iz arapskih jezika. Radi se o istom imenu koje već pet godina za redom, točnije od 2011. godine,

biva najčešće ime dano novorođenim dječacima u Engleskoj i Walesu.

Sveukupno, u 2016. godini rođeno je 7.084 dječaka s imenima Muhammad, Mohammad, i Mohammed, više od Olivera s 6.623. Samo se zapitajte tko je ovo mogao i pomisliti samo prije 50 ili 100 godina?! Uzvišeni Allah je svog Posljednjeg Poslanika počastio posebnim imenom i njegovo ime uzdigao nad ostalima.

Hutbu ćemo završiti ajetom u kome Allah, dž.š., vjernicima daje jedan savjet i naredbu: „Allah i Njegovi meleki donose salavate na Vjerovjesnika. O vjernici, donosite i vi salavate na njega i šaljte mu selame!“ (El-Ahzab, 56.)

Molim Uzvišenog Allaha da nam, kroz naše učenje salavata i slijeđenje Sunneta, poveća našu ljubav prema Poslaniku, s.a.v.s., i da nam omogući da se družimo sa njim u najljepšim džennetskim perivojima.

Amin!

Prethodne hutbe potražite na našoj stranici: www.medzlis-split.org
Zasnovano na pisanju hftz. Midhat ef. Sejfića
Pripremio: Vahid ef. Hadžić
Split, 01.12.2017.

